

Morning Regional Dogri News Bulletin, 13th August 2024

मार्निंग डोगरी न्यूज़ बुलेटिन, समे. 09-20 Hrs

<><><><><><>

Headlines

1. जम्मू कश्मीर पुलस नै हाल च होए दे आतंकी हमलें च पाकिस्तानी आतंकवादिएं गी मदद उपलब्ध करोआने आले 9 सहायकें गी गिरफ्तार कीता ऐ।
2. उपराज्यपाल मनोज सिन्हा होरें आखेआ ऐ जे केन्द्र दी मदद कन्नै जम्मू कश्मीर दे प्रशासन नै प्रदेश गी कर्जे थमां बाहर आहन्नेआ ऐ ते जम्मू कश्मीर दी जीएसडीपी मेद ऐ जे चालू माली ब'रे दरान 7.5 फीसद रौहग।
3. जम्मू खित्ते च स्वतंत्रता ध्याड़े शा पैहले हर घर तिरंगा अभियान तैह्त तिरंगा रैलिंग दा आयोजन कीता जा'रदा ऐ।
4. जम्मू संभाग दे डिवीजनल कमीशनर होरें चला'रदी मचेल माता यात्रा दरान श्रद्धालुएं दे रौहने आस्तै मचेल च आसरमे दा उदघाटन कीता।

<><><><><><>

Terror Associates Arrested

जम्मू च सांबा ते कटुआ सेक्टर कन्नै लगदे अंतर्राष्ट्रीय बन्ने थमां घुसपैठ करने आले पाकिस्तानी आतंकवादिएं गी मदद उपलब्ध करोआने आले 9 सहायकें गी जम्मू कश्मीर पुलस नै गिरफ्तार करियै इक बड्डी सफलता हासल कीती ऐ। आतंकवादिएं दे एह सहायक उनेगी उधमपुर, कटुआ ते डोडा जिले दिएं उच्चिएं थाहरें बारे जानकारी दिंदे हे। आकाशवाणी जम्मू संवाददाता रिपोर्ट मूजब इस गिरोह दे मुख् साजशकर्ता दी पंछान मोहम्मद लतीफ उर्फ हाजी लतीफ दे तौर पर होई ऐ। एह कटुआ दे अम्बे-नाल दा रौहने आला ऐ। पुलस प्रवक्ता नै आखेआ ऐ जे कुल 50 लोक जेहड़े ढोकें च रवा'रदे न ते पहाडिं पर अपने माल बच्छें गी चारदे न, उंदे थमां पुच्छ गिच्छ कीती। इस दरान पता लग्गा ऐ जे इनें लोकें 3 थमां 4 आतंकवादिएं गी रौहने-बौहने लेई थाहर, खाने पीने दी चीजे सनें होर दूई सहूलतां उपलब्ध करोआइयां। एह आतंकवादी 8 जुलाई गी कटुआ जिले दी मच्छेड़ी थाहर होए दे आतंकवादी हमले च शामिल हे। इस आतंकवादी हमले च जेसीओ सनें फौज दे 5 जवान शहीद होई गे। इनें विदेशी आतंकवादिएं गी रूट्टी, पानी ते आसरमां उपलब्ध करोआया हा। किश नै एह बी मन्नेआ जे उनें आतंकवादिएं थमां पैसे बी लैते हे। जिनें लोकें इस बारे पुलस गी जानकारी दित्ती, उनेंगी बेकसूर मन्नेआ जा'रदा ऐ।

<><><><><><>

LG-Sinha

उपराज्यपाल मनोज सिन्हा होरें आखेआ जे केन्द्र दी मदद कन्नै जम्मू कश्मीर दे प्रशासन ने प्रदेश गी कर्जे थमां बाहर आन्नेआ ऐ ते आर्थिक स्थिरता आली बत्ता पर अगड़ा बघाया ऐ। उनें पिछले 5 ब'रें गी शांति, खुशहाली ते आसें मेदे आला दस्सेआ। लोकसभा चुनाएं च होए दे 58 फीसद मतदान गी बी उनें उजागर कीता। उनें आखेआ जे एह उंदे प्रशासन दी इक टकोहदी उपलब्धि ऐ। उनें आखेआ जे पिछले त्रुं ब'रें दरान बिजली दिएं दरें च कोई बाद्धा नेई कीता गेआ ऐ। जम्मू कश्मीर च बिजली दे कराए पंजाब, हिमाचल प्रदेश ते हरियाणा थमां घट्ट न। उपराज्यपाल होरें आखेआ जे 2019 च जिसलै जम्मू कश्मीर थमां दफा 370 गी हटाया गेआ हा, अदू थमां लेई जम्मू कश्मीर च खरा ते सकारात्मक बदलाव आया ऐ। उनें आखेआ जे सैलसफा,

बिजली सरबन्धी ढांचे ते जम्मू कश्मीर बँक दी माली हालात च टकोहदा सुधार होआ ऐ। सिन्हा होरें आखेआ जे जम्मू कश्मीर दी जीएसडीपी मेद ऐ जे चालू माली ब'रे दरान 7.5 फीसद रौहग। 2024-25 लेई जीएसडीपी 2.63 लक्ख करोड़ रौहने दी मेद जाहर कीती गई ऐ जेहड़ा पिछले ब'रे दे मकाबले जीएसडीपी च 7.5 फीसद दे बाढ़े गी दर्शादा ऐ।

<><><><><><>

Har Ghar Tiranga

जम्मू खित्ते च हर घर तिरंगा अभियान दे तैहत जिला प्रशासन आस्सेआ केई कार्यक्रम करोआए जा'रदे न। एह सारे कार्यक्रम आजादी दे ध्याड़े दे सरबन्धै च न। इंदा मकसद लोके च देशभक्ति ते एकता दी भावना गी बढ़ावा देना ऐ। सांबा दे जिला प्रशासन आस्सेआ तिरंगा रैली दा सरिस्ता कीता गेआ। एह रैली ऐतिहासक सांबा किले थमां शुरू होई ते वीर भूमि पार्क जाइयै सम्पन्न होई। इस रैली च समाज दे हर वर्ग नै हिस्सा लैता, एहदे च जिला सैक्टरल, सरकारी ते गै सरकारी संगठनें, सवयं सेविण, विद्यार्थिण ते आम लोके हिस्सा लैता। इसै चाल्ली रामबन च जिला प्रशासन नै जिले भरै च तिरंगा रैलिण दा सरिस्ता कीता। मुख् थाहरें पर देशभक्ति आले कार्यक्रम आयोजित कीते गे। गूल च तिरंगा बाइक रैली दा सरिस्ता कीता गेआ। हर घर तिरंगा अभियान च शिक्षा इदारे, जिंदे च कालेज, स्कूल ते होर दुए इदारे शामिल न, हिस्सा लैता। राजौरी जिले च बी तिरंगा यात्रा दा सरिस्ता कीता गेआ। एह यात्रा पीडब्ल्यूडी डाक बंगले थमां शुरू होई ते खेड्ड स्टेडियम जाइयै सम्पन्न होई। इत्थें सांस्कृतिक कार्यक्रमें दा बी सरिस्ता कीता गेआ। यात्रा दरान प्रतिभागिण आस्सेआ तिरंगा सगंध बी लैती गई। इस दरान प्रतिभागिण सगंध चुक्की जे ओह राष्ट्रीय झंडे दे मान, सम्मान गी बनाई रखन ते मुख् दे नागरिकें बशकार एकता दी भावना गी बढ़ावा देंगन ते मुख् दी अखंडता गी बरकरार रखने च अपना योगदान देंगन।

<><><><><><>

Chief Secretary

मुख् सचिव अटल डुल्लू होरें कल स्मार्ट सिटी मिशन ई-बसें ते कचरे दे प्रबंधन सनें बक्ख-बक्ख विकास परियोजनाएं दे चला'रदे कम्में दा जायजा लैने आले घरै मकानें ते शैहरी विकास मैहकमे कन्नै बैठक लाई। मुख् सचिव होरें दौनें शैहरी च जारी स्मार्ट सिटी परियोजनाएं तैहत चला'रदे कम्में गी समें सिर मुकम्मल करने आस्तै ठेकेदारें ते निगरानें गी आखेआ जे ओह जमीनी सतह उप्पर तक्क रखन। श्रीनगर ते जम्मू च चला'रदी ई-बसें बारे मुख् सचिव होरें सरबन्ध मैहकमे गी आखेआ ऐ जे 200 किलोमीटर तगर रोजाना 350 यात्रिण गी एह सेवा उपलब्ध करोआइ जानी लोडचदी। घरै मकानें ते शैहरी विकास मैहकमे दी कमीशनर सैक्रेटरी मनदीप कौर होरें स्वच्छ भारत मिशन 2.0 ते घरै मकानें ते शैहरी विकास मंत्रालय दे सीआईटीआई ते सीआईटीआईआईएस कार्यक्रमें दे तैहत श्रीनगर ते जम्मू च कचरे प्रबंधन गी चला'रदे होरने कम्में गी अगो बघाए जाने दी योजना बारे जोर भरेआ।

<><><><><><>

Tax Collection

पैहली अप्रैल थमां 11 अगस्त तोड़ी कुल सिददे टैक्सें सरबन्धी ग्राई पिछले ब'रे दी इसै अवधि दे मकाबले च 23.99 फीसदी बधियै 8 लक्ख 13 जहार करोड़ रपे तोड़ी पुज्जी गई ऐ। आमदन टैक्स मैहकमे नै आखेआ जे पिछले ब'रे दी इसै अवधि च सिददे टैक्स ग्राई 6 लक्ख 55 जहार करोड़ रपे ही। मैहकमे मूजब चालू माली ब'रे 2024-25 च 11 अगस्त 2024 तगर दे शुरू प्रवक्ख कर संग्रह 22.48 फीसद बधियै 6 लक्ख 93 जहार करोड़ रपे होई गेआ ऐ।

<><><><><><>

Div.Com Machail Yatra

जम्मू दे डिवीजनल कमीशनर रमेश कुमार होरें कल किशतवाड़ दे पाड़डर च मचेल माता तीर्थ थाहरै दा दौरा लाया। अपने इस दौरे दरान उनें श्रद्धालुएं लेई बुनियादी ढांचे ते उनेंगी उपलब्ध करोआने सरबंधी बक्ख-बक्ख सहूलतें दा जायजा लैता। डिवीजनल कमीशनर होरें उत्थें मत्था बी टेकेआ ते यात्रिएं आस्तै बनाए गेदे आसरमें दा उद्घाटन कीता। यात्रिएं आस्तै बनाए गेदे आसरमें च 7 हाल शामिल न, जिंदे इक समें च 175 थमां बद्ध श्रद्धालु ठैहरी सकदे न। डिवीजनल कमीशनर होरें भरोसा जताया ऐ जे एह सहूलत श्रद्धालुएं आस्तै तीर्थ यात्रा दे अनुभव गी बधाने च अहम भमूका नभाग ते उंदे अराम आस्तै आसरमें दी सुविधा गी जकीनी बनाग। उनें श्रद्धालुएं कन्नै गल्लबात बी कीती ते उनेंगी उपलब्ध करोआई जा'रदी सुविधाएं बारे पुच्छ-गिच्छ बी कीती। श्रद्धालुएं अपने अपने अनुभव सांझा करदे होई उनेंगी दित्ती जा'रदी सहूलतें दी सराहना कीती जेहदे कन्नै उंदी यात्रा गी अरामदेह बनाया गेआ ऐ।

<><><><><><>

Social Welfare Ramban(byte)

समाज कल्याण मैहकमे नै नशीले पद्धार्थे दे माड़े असर ते युवाएं दे खेड्डें प्रति जागरूकता बधाने सरबंधी अपने जतनें गी तेज करी दित्ता ऐ। रामबन दे सीएमओ हुंदे मार्गदर्शन च मैहकमे आस्सेआ समर्थ निम्रण कार्यक्रम दा सरिस्ता कीता गेआ। एहदा मकसद लोकें दी ताल करना ऐ जेहड़े नशीले पद्धार्थे दे लत च फसी गेदे न। रामबन दे जिला अस्पताल च इनें लोकें दे इलाज लेई ओपीडी दी सहूलत दित्ती जाग। इसले जिला अस्पताल च तकरीबन 115 लोक इलाज हासल करा'रदे न। समाज कल्याण मैहकमे नै जागरूकता अभियान चलाया ऐ तां जे युवा लोकें गी नशीले पद्धार्थे दे माड़े असर बारे जानकार बनाया जाई सकै। आकाशवाणी कन्नै गल्ल करदे होई समाज कल्याण अधिकारी राहुल गुप्ता होरें आखेआ.....बाईट

<><><><><><>

Commissioner Secretary

समाज कल्याण मैहकमे दी कमीशनर सैक्रेटरी शीतल नंदा होरें कल ब्लाक अखनूर दे काम्यूनिटी हाल गुड़ा ब्राह्मणा च इक सार्वजनिक दरबार दी अध्यक्षता कीती। इस मौके पर उनें लोकें दी बक्ख-बक्ख परेशानिएं दे विकास सरबंधी मुद्दें गी संबोधत कीता। दरबार च मकामी लोकें दी बड़े उत्साह कन्नै भागीदारी दिक्खी गई जिनें समाज कल्याण कायदें कन्नै जुड़े दे मामलें गी पुट्टेआ, आमतौरा पर बर्जुगें ते बक्ख-बक्ख समर्थे गी प्रभावत करने आले मामलें गी मकामी लोकें कन्नै गल्लबात करदे होई कमीशनर सैक्रेटरी होरें समाज कल्याण स्कीमें ते उनेंगी हासल करने दी योजनाएं बारे तफसील च जानकारी दित्ती। उनें मौके उप्पर गै मते सारे मुद्दें गी सुनेआ ते उंदे पर होर गल्लबात करने दी लोड़ गी दिक्खदे होई इनें मामलें पर चर्चा दे निर्देश जारी कीते। भलवाल ब्राह्मणा दे डीडीसी मिंबर होरें उत्थें पेश आवा'रदी परेशानिएं गी उजागर कीता, जिंदे च पानी दी सुविधा, जरूरी सरकारी सेवाएं लेई अमलें च बाद्धा ते हाड़ें सरबंधी उपाह शामिल हे। कमीशनर सैक्रेटरी होरें उत्थें मजूद सब्बने लोकें गी भरोसा दोआया जे उंदे मुद्दें ते शकैतें गी हल करने आस्तै पैहली प्राथमिकता दित्ती जाग।

<><><><><><>

DECC Ramban

जिला रोजगार ते काउंसलिंग सेंटर रामबन नै गुंडी धर्म दे बीडीओ दफतर दे सैहयोग कन्नै बेरोजगार युवाएं गी मुमकिन, तेज्जस्विनी ते उद्यमियता दी प्रेरणा देने जनेह स्वरोजगार योजनाएं बारे जानकारी देने दे मकसद कन्नै इक जागरूकता शिाविर दा आयोजन कीता। इस मौके पर बोलदे होई वक्ता होरें जेके रोजगार पोर्टल ते राष्ट्रीय कैरियर सेवा(एनसीएस) पोर्टल पर उपलब्ध रोजगार सेवाएं गी उजागर कीता। उनें ओने आली नौकरी मेले बारे बी चर्चा कीती ते युवाएं गी मैहकमे कन्नै जुड़े रौहने लेई अपील बी कीती।



Model Solar Village

सरकारै आदर्श सौर ग्राम दी अमलावरी आस्तै दिशा निर्देश जारी कीते न। एह पीएम सूर्य घर मुफ्त बिजली योजना तैहत आदर्श सौर ग्राम सरबन्धी कार्यक्रम गी लागू करने बारे दिशा निर्देश जारी कीते न। नमीं ते परती-परतियै बरतोने आली ऊर्जा सरबन्धी मंत्रालय नै कल इक ब्यान च आखेआ जे इस स्कीम तैहत मुल्ख भरै दे हर इक जिले च इक आदर्श सौर ग्राम बनाने पर जोर दित्ता गेदा ऐ। मंत्रालय नै आखेआ जे एहदे लेई 800 करोड़ रपे अलाट कीते गे न।

